

# «Glieud che drova agid, eisi da gidar»

Ella vischnaunca da Mustér vivan actualmein 139 fugitivs da l'Ucraina. Mustér ei la vischnaunca che dat suttetg als pli biars fugitivs en Surselva. Ed en Surselva vivan ad interim in quart dils fugitivs dall' Ucraina ch'ein el Grischun. Il motiv pil grond diember da fugitivs a Mustér ein iniziativas privatas.

MARTIN GABRIEL/FMR

Duront il Point de Presse digl Uffeci cantunal da migraziun dad ier a Cuera, ha il president da vischnaunca da Mustér *René Epp* raquintau denter auter dallas experientschas positivas che sia vischnaunca hagi fatg culs fugitivs dall'Ucraina: «Ils 75 carschi ed ils 64 affons cul status S ein fetg autonyms e s'integreschan bein en la veta sociala dil vitg.» Epp ha era menzianau la collavuraziun cun igl Uffeci da migraziun e cun las instanzas cantunals da scola che funcziuneschien a moda e maniera nunbirocratica e sempila.

## Soluziun a liunga vesta pil Resort Catrina

René Epp ha relativau la curella ch'il Resort Catrina dovrà la stad 2022 il plaz per ils hospis da vacanzas ed ils habitants dall'Ucraina en il resort stoppien untgir en in niev habitadi. «Entochen la fin d'uost ei il suttetg pils 52 fugitivs dil Resort Catrina segiraus. Pil temps suenter essan nus dal la vischnaunca ensemens cun ils uffecis cantunals vidlunder da tschercar ina nova soluziun.»

## Pertucont l'integrazion scolastica ei Mustér in'excepziun

Il suttetg a liunga vesta per la gruppera da fugitivs dall'Ucraina en il Resort Catrina ei ina sfida. L'autra part ei l'integrazion en la scola populara dils pressapauc 30 scolars dil resort. «La scola da Mustér ha integrat entochen ussa otg scolares e scolars dall'Ucraina», ha igl menader districtual digl inspectorat da scola, *Alexi Nay* detg alla FMR. «Da vuler integrar en ina gada 30 ulteriurs scolars ei buca stau pusseivel a cuorta vesta. El mument tscherchein nus ensemens cun igl uffeci cantunal da migraziun ina

## «Nus essan daventai in bien exempl per las autras vischhnancas.»

René Epp,  
president communal Mustér

soluziun per possibilizar a tuttas scolares e scolars d'ir a scola e survegnir la promozion da lungatg.» Tenor Alexi Nay ei ina part da quella soluziun per l'integrazion dils scolars gia instradada. «Igl ei da dir, che Mustér ha fetg biars affons fugitivs dall'Ucraina ed ei en quei senn ina excepziun en Surselva. En tut ils autters vitgs havein nus buc tons affons dall'Ucraina en las scolas regularas.»

## Iniziativa privata surprendenta

76 da 139 fugitivs dall'Ucraina a Mustér han cattau in suttetg privat. La suprastonza communal ha plascher dalla gronda iniziativa privata da habitontas e habitants da Mustér. Ella ha el medem mument denton era respect dalla gronda sfida. «Quei secapescha buca da sesez», René Epp detg alla FMR, «glieud che drova agid, eisi da gidar. E sch'ins mira cun tgei difficultats stermentusas che quels en l'Ucraina han da batter en l'atgna tiara, lu ein ils problems che nus havein cheu minims.»

## Cifras da fugitivs a Mustér

**Diember total:** 139 persunas  
**Center da transit Bellavista:** 63 persunas (center collectiv)  
**Resort Catrina:** 52 persunas (privat)  
**Hotel Disentiserhof:** 23 persunas (privat)  
**Chasadas privatas:** 3 persunas  
**fontauna:**  
**Uffeci da migraziun GR / Vischnaunca da Mustér**

## Igl ei pusseivel

Cun l'acziun da dar suttetg a biars fugitivs hagi sia vischnaunca mussau ch'eis seigi pusseivel da cattar suttetgs pigl emprem temps e d'integrar ils scolares aschi bein sco pusseivel, ha Epp detg. «Nus essan daventai in bien exempl per las autres vischhnancas.» El spera semplamein che la situaziun en l'Ucraina semidi el senn positiv pil pievel. El cass cuntrari muntassi quei che las regiuns survegnessien biars novs fugitivs suplementars «Cunquei che Mustér ha ussa prest neginas capacitads pli stuess ins lu segiramein mirar cun il cantun e la regiun co eventualmein reparter il diember da fugitivs sin l'entira vallada.»